



Raja Norain Hidayah
Raja Abdul Aziz
rnorain@hmetro.com.my

Nenek pun teruja

Warga emas tak mahu lepas peluang sertai Slide The City

Kuantan

Kelibat seorang wanita warga emas beratur menunggu giliran untuk meluncur air dalam acara 'Slide The City' di Bandar Indera Mahkota, di sini, kelmarin, mencuri perhatian.

Mana tidaknya, dengan berambut serba putih dan keadaan fizikalnya tidak 'segagah' orang lain membuatkan pengunjung memandang dua kali ke arah Teck Ai, 80, malah tidak kurang juga mengaguminya.

Namun, bagi wanita berusia hampir satu abad itu, dia tidak kisah pandangan orang lain sebaliknya mahu menikmati keseronokan bersama cucunya, Phang Kar Ying, 20, walaupun usianya lanjut.

Katanya, itu bukan pengalaman kali pertama kerana dia pernah menyertai acara itu di Putrajaya pada Disember tahun lalu dan sebaik dimaklumkan ia diadakan di bandar ini, dia tidak mahu melepaskan peluang itu.

"Saya teruja menyertai acara ini kerana ia seronok, lagi pun pihak penganjur tidak meletakkan had umur maksimum jadi selagi mampu saya melakukan slide (luncur air) ini.

"Ketika (usia) muda saya tidak berpeluang menyertai acara seperti ini, jadi saya mahu menebusnya dan mahu merasai keseronokan sendiri," katanya, di sini, kelmarin.

Sementara itu, penuntut Universiti Malaysia Pahang (UMP) Nurul Shariena Othman, 22, berkata walaupun beratur untuk mendapatkan giliran meluncur hampir satu jam namun ia tidak membantutkan keterujaan-

SHARKAR bersama sebahagian peserta pada majlis perasmian Slide The City di Bandar Indera Mahkota.



nya.

Katanya, dia datang bersama empat lagi rakan seawal jam 10.30 pagi dan tidak menghiraukan keadaan hujan renyai ketika itu.

"Pengalaman sangat mengujakan dan mencabar berbanding aktiviti meluncur air yang pernah saya sertai sebelum ini, malah ia menyeronokkan apabila saya melihat pemandangan luar ketika meluncur.


"Dari segi pemakaian pula tidak timbul masalah kerana pihak penganjur menetapkan larangan memakai bikini," katanya.

Slide The City menyediakan gelongsor air sepanjang

304.8 meter dengan tiga lorong pastinya memberi peluang kepada pengunjung merasai keunikan dan keseronokan meluncur di tengah bandar.

Acara itu sebelum itu pernah diadakan di Putrajaya pada Disember tahun lalu dan Taman Botanical Ayer Keroh, Melaka, pada 14 Mei lalu.

Ia bagaimanapun mendapat pelbagai reaksi selepas tersebar di laman sosial Facebook meminta orang ramai memboikot penganjur itu atas dakwaan mewajibkan penggunaan baju renang selain menyebabkan kesesakan jalan raya.



PESERTA menikmati Slide The City di Bandar Indera Mahkota.

Sementara itu, Pengerusi Jawatankuasa Pelancongan dan Kebudayaan Pahang Datuk Seri Mohd Sharkar Shamsudin berkata, isu berkenaan tidak sepatutnya timbul kerana kerajaan negeri menetapkan beberapa syarat kepada pihak penganjur termasuk larangan

memakai bikini.

Beliau berkata, bagaimanapun pihaknya bercadang memasukkan seorang wakil daripada pejabat agama dalam merancang setiap program pelancongan dan rekreasii bagi mengelakkan sebarang kontroversi pada masa depan.